

30.

COMPETITIO AD AGGREGATIONEM
JUSSU REGIS OPTIMI, ET EX MANDATO SUMMI REGIÆ
UNIVERSITATIS MAGISTRI, INSTITUTA ANNO 1827.

Ex fluidis imponderabilibus dictis, quænam auxilia
therapeutica ?

THESIS

Quam, Deo favente, in saluberrimâ Facultate medicâ Parisiensi,
præsentibus competitionis judicibus, publicis competitorum
disputationibus subjiciet et dilucidare conabitur, die 18 maii
1827,

P. L. COTTEREAU,

DOCTOR MEDICUS.



PARISIIS;
EX TYPOGRAPHIA EVERAT,
VIA DU CADRAN, N° 16.

M. DCCC. XXVII.

CONCERTATIONIS JUDICES.

PRÆSES.	D.	DE LENS.
		CLARION.
		DUMERIL.
		GUILBERT.
JUDICES.	DD.	ORFILA.
		PELLETAN.
		COUTANCEAU.
		JADELOT.
		ALIBERT.
VICARIU.	DD.	ARVERS.
		GAULTIER DE CLAUBRY.

COMPETITORES.

DD. DRONSART.
BRIQUET.

DD. COTTEREAU.
BRONGNIART.

PRÆSTANTISSIMO VIRO

DOCTORI


BRETONNEAU,

AMANTISSIMI IN EUM ANIMI TESTIMONIUM

D. V. C.

Memor et gratus discipulus;

P. L. COTTEREAU.



Digitized by the Internet Archive
in 2016

<https://archive.org/details/b22413881>

EX FLUIDIS IMPONDERABILIBUS DICTIS, QUÆNAM AUXILIA THERAPEUTICA ?

PROOEMIUM.

Fluida imponderabilia, quoad applicationes therapeuticas, jam à multis amplissimisque viris sigillatim et fusè tractata fuerunt, et de unoquoque impleta sunt volumina. Paucorum dierum spatium, thesim, quam tanti ponderis materia postulavisset, exarare impossibile fuisset; et verò cancellos mihi circumdedi, et, minutissima argumentatione consecuturus, intrà fines capitum maximè eminentium cessi. Calorici, luminis nec non fluidi electrici generales primùm, postea therapeuticas proprietates deinceps exposui, casusque pathologicos, in quibus hæc fluida fructuosè adhibita fuisse videntur, quàm accuratissimè potui, pro terminis constitutis, indicavi. Posthæc acupuncturæ, cùm ejus actio à plurimis nostri ævi ad electricitatem referatur, effectus ponderavi, et tandem illius præcipuos et felice exitu comprobatos usus adnotavi. Magnetem, id est armaturas magneticas, ad nervosos affectus ardentè aliquandiù jactatas, in præsens autem obsoletas, silentio prætermisi; item de perkinismo cujus efficientiam alii in fluidum electricum detractum, alii in nimiam animi elationem conferunt, et cujus præsertim usurpatio oblivione jam exstinguitur. Quoad fluidum magneticum animale dictum, aliis verè existens, aliis meræ præstigiæ habitum, cùm mihi forent majoris

momenti sat multa , quin imò et nimia perpensanda , de illo sermonem æquè abstinui.

Denique , ut omnia quæ objici possunt quantùm in me est anteoccupem , hìc præmonebo machinæ electricæ , leydensis lagenæ voltaicæque pilæ descriptiones et theoreticas consultò fuisse silentio præteritas ; hæc enim meis competitoribus planè cognita arbitratus sum , et usum therapeuticorum explanationem instrumentis exponendis potiore habui.

DE FLUIDIS IMPONDERABILIBUS.

Inter corpora naturæ alia imponderabilia , alia ponderabilia sunt. Priora , de quibus hìc agendum , fluida dicta imponderabilia , abundanter et universè sparsa existunt , atque in posteriora vim ingentissimam exercent. Eorum imponderabilitate impulsì , physici quidam illa habuère dubia , plerique verò agnoscunt ; etenim illorum existentiâ explicatio phænomenorum quæ præbent facilior evadit. Hæc fluida , numero tria , sunt *Caloricum* , *Lumen* et *Fluidum electricum*. Olim prætereà annumerabantur fluidum galvanicum nec non fl. magneticum ; hodiè verò illa electrici fluidi modos merè varios esse ferè omnes consentiunt.

CAPUT I.

DE CALORICO.

§ I. *De Calorici generatim spectati proprietatibus.*

Caloricum fluidum est subtilissimum , omnibus naturæ corporibus conjunctum , radiatè se movens quandò liberum. Si corporibus accumulatum , illa plus minùs dilatat ; nostris organis admotum , hanc sensationem procreat quam vocant calorem ; et , si contrà detrahatur , inversa phænomena , nempè contractio et frigoris sensatio , adsunt.

I. *De calorico radiante.* — Caloricum, corpore calido emissum, radiis rectis et reflexilibus progredi, speculorum parabolicorum experimento clarè comprobatur (ORFILA, Éléments de chimie).

II. *De dilatatione corporum.* — Corpora calorico accumulato dilatantur, id est, moleculis distentis ampliora fiunt. Istam dilatationem multa patefaciunt, v. g. *P. Kirwan* (1785) experimenta de pondere specifico variis temperiebus, et alia recentiora omnibus adeò cognita, ut ea revocare necessarium non sit (ORFILA, loco citato). Hæc calorigi proprietas attractioni contraria est, et consensu earum virium soliditas, liquiditas gazeitasque corporum pendent. Verùm cuncta naturæ corpora, eadem temperiei subiecta, calorico non æquali modo dilatantur. Solidorum et liquidorum dilatatio, pro illorum naturâ et pro caloris gradu, varia perspicitur. Gaz contrâ et vapores, DD. *Gay-Lussac* et *Dalton* experientibus, eâdem temperie et singulo gradu æqualiter dilatantur, quod recens à DD. *Dulong* et *Petit* confirmatum est.

III. *De calorigi æstimatione.* — Quò magis corporibus accumulatur caloricum, eò magis accrescit eorum calor. Gradus hujusce caloris æstimationis capax dicitur *temperies*, et, cùm admodum variari possit, instrumenta quædam, nomine thermometra et pyrometra, ad illum explorandum adhibentur, inter quæ præcipua therm. centigradum, therm. Fahrenheit, therm. Réaumur, therm. Delisle, therm. Leslie, pyrom. Wedgwood, pyrom. Lavoisier et de Laplace, pyrom. D. Brongniart.

IV. *De conductibilitate corporum quoad caloricum.* — Omnia corpora calorico permeantur; ista verò proprietas, cui nomen *conductibilitas*, in illis perdiversa est. Inter solida, alia, v. g. metalla, etc., conductores dicta, illud fluidum quoquoersus facillimè transmittunt; alia, ut putà lignum, vitrum, resinæ, etc., minore conductibilitate gaudent. Ea proprietas in liquidis imperfecta, et in gaz minima detegitur. Prætereà corporum conductibilitas proprietatibus physicis modificata apparet; etenim

solida, albo colore et expolita, radios calóricos reflectuntur et non nisi lentè calescunt; eadem contrà, si nigra et rugosa sit superficies, caloricum expeditè absorbent; undè concluditur: quò plus facultas corporum reflectens adaugetur, eò plus facultas eorum absorbens imminuitur, et vice versâ. Quod ad refrigerationem attinet, item de facultate eorum emittente habitâ ratione facultatis reflectentis.

V. *De capacitate corporum quoad caloricum.* — Duo corpora, naturâ diversâ, pondere æquali, simul aquâ bulliente calefacta, eamdem temperiem mox nanciscuntur. Quantitas verò calorigi quolibet seorsum in eo experimento absumpta dispar est; hæc dissimilis calorigi quantitas, singulo quoque corpore requisita, *caloricum specificum* vocatur. Variis instrumentis, nempe calorimetro Lavoisier et de Laplace, calorim. Rumford, etc., capacitas corporum quoad caloricum investigata, pro naturâ et statu horum corporum, et, in quibusdam, pro temperie, à physicis diversa reperta fuit.

VI. *De calorigi fontibus.* — Caloricum oritur: 1°. à sole, cujus in radiis luminosis semper existit; 2°. à *compressione corporum*; quod probat ignis silice percusso elicitus; 3°. à *corporum unione intima*, ut fit in combustione ligni aliarumque combustioni obnoxiarum substantiarum.

VII. *De frigore.* — Sensatio detractio calorigi procreata frigus appellatur. Illam physici quidam fluidi peculiaris, quod *frigorigicum* vocant, consecrariam habent. Sed isto fluido non opus est, cum omnia phænomena calorigo detracto explicari possint (ORFILA, loco citato).

Ni physiologicæ digressioni obstarent, et cancelli circumdati et ipsum merè therapeuticum propositum, hîc sanè locus esset laudandi phænomena caloris, intrâ viventia entia producta, quæ prof. Pelletan nuperrimè exposuit, calorigi nimirum trans organa plus minùs rapidi profluentes, existentia quorum maximi est momenti. Accuratâ enim à perpensatione horum profluentium peru-

tiles, tùm ad physiologiam, tùm ad pathologiam rationemque medendi, applicationes manare possunt, quod apprimè paucis exemplis demonstravit. Si verò, ad enarranda singula quæ de his scripsit, spatium mihi desit, ea vixdùm à me indicata, occasione datà, argumentatione dilucidare aggrediar.

§ II. *De Calorici therapeuticis proprietatibus.*

Si ad corpora spectemus in nos agentia, quatenùs è temperie illorum proprietates pendeant, et ad morbos debellandos indè inservire possint, caloricum semper inter excitantia recensendum, actionemque horum corporum pro eorum nostràque temperie variari memoremus. Etenim et accumulatione et detractone caloricì agere queunt. Calor non delens, immediatè, frigusque torpore non afficiens, reactione excitatâ, æquè excitant et stimulant; quorum effectuum fines, pro hominibus, pro amplitudine superficierum quibus applicantur, pro sensibilitate propriâ sympathicisque relationibus organorum, etc., variæ deprehenduntur.

Frequentius usurpatur in therapeuticâ, sive intùs, sive extrinsecùs, caloricum. Si intùs, potuum et ciborum nec non enematum et injectionum ope introducitur. Pharmacorum ad usum internum destinatum, pro exitu immediato appetito, temperies aptanda est. Sic, ad irritationem localem generalemve potibus frigidis anteponuntur potus tepidi qui, calidiores ministrati, malum ingravarent. Contrà, in acutis febribus, stipatis calore mordace, acri, tangentem manum urente, potus frigidi subministrantur, quod quidem ægrotantium appetentiæ consentaneum est. Liquida gelida, ut putà ad gradum 0 thermometri centigr. devecta, vomitiones spasmodicas inhihent, dùm leviter calentia et copiosè ingesta vomitum cient; si calidiora, rursùs mutatur illorum actio, tonica fiunt et quidam antiemetica. Tandem potus frigidi lotium, fervidi sudorem citant. Sed de his multa satis, et ad usum caloricì externum transeamus.

Illius actioni si totius corporis superficies submittitur, v. g. quandò in laconico ad 75°. † 0 thermom. centigr. calefacto reponitur æger, urens doloris sensus plurimis partibus, et præsertim papillis, palpebris naribusque percipitur; tumescit cutis et erubet, ejusque accrescit calor; crebrescit pulsus, intervenit generalis anxietas, magis aut minùs ægrè trahitur spiritus; sudor adest; calor adaugetur; sititur; turgēt vultus, prominent oculi; tandem hisce symptomatibus cephalalgia, vertigines et quidem syncope interdum sese adjungunt. Si cui parti solùm applicatur caloricum, rubefactionem, vesicationem vel escharificationem producere potest. Nunc casus varios perpendamus in quibus therapeutica caloricum his modis adhibet.

Quandò excitanda sunt systema cutaneum et subjacentia, aut quandò instituenda est rubefactio, modus agendi pro latitudine superficiei calórico subjiciendæ variat. Si diffusæ partes, radiis solaribus, flammis è substantiis ardentibus, arenatione vel calidario, pro circumstantiis utendum erit. Usurpatur hæc medicatio ad affectiones systematis lymphatici chronicas, ex. gr. anasarcam, scrophulas, tabem mesentericam. Insolatio ad ulcera vetera curanda pariter utilis visa fuit (Faure).

Si contrà partes circumscriptæ, radiis solaribus lente vitreâ concentratis, sive prunâ aut ferro candente ad partem propiùs admotis utendum est.

I. Primus inter hos modos, nempè radiorum solarium concentratio, ad curationem ulcerum atonicorum laudatur à DD. Lapeyre et Lecomte. Sed prof. Marjolin istam cauterisandi rationem, ex quâ dolor fermè intolerandus prodit, penitùs negligendam existimat. Observavit enim, in nosodochio dicto *Salpêtrière*, quamdam adolescentulam cujus nasum totum genasque partim ulcus herpeticum exederat; atqui morbus initium duxerat ab exiguâ impetigine quam pluriès hoc cauterisationis modo curare tentarant.

II. Secundus, id est pruna, saltem semel in die, alternis vicibus admota ad organum dolens, donec calorem absque adustione non diutiùs sustineat æger, tùmque remota, ad perniones vulgò usurpatur. D. Faure hanc caloricæ applicandi rationem prospero eventu adhibuit ad ulcera veteriora, ad quamdam glandulæ mammariae intumesceniam quam cancrum occultum dicit, ad impetiginem, contusiones, ecchymoses, erysipelatosos affectus varios, anthracem, etc.

III. Tertius, videlicet ferrum candens, cauterium objectivum dictum, supradicto meritò anteponitur, quòd, ait D. Percy (*Pyrotechnie chirurgicale*), ferrum calorem servat et æqualiter calfacit, dùm contrà prunæ, citò extinctæ, irregulariter agunt, frequenterque renovandæ sunt. Ad hanc cauterisationem adhibetur cauterium seu nummularium seu octogonum, candens, quod, primùm quinque aut sex pollicibus parte ægrotâ distans, ad illam paulatim admovetur, ut jam de prunâ dixi.

Hippocrates, Ruland (Curat. empiric.), Manget (Biblioth. pract.) fluxum hæmorrhoidalem immoderatum, et Thomas Willis epistaxim pervehementem sic represserunt. Practici quidam ad prolapsus uteri et recti, nec non ad herniarum incarcerationem eâ ratione haud incassum usi sunt. (Percy, loco citato), quod Roderic (de morb. mulier.) ad pavorem refert, quandò, de utero dicens, scribit: « *Præstat cauterium actuale ignitum* » *manu ostentare, ac simulet medicus vel obstetrix velle partem* » *tangere; ita enim natura retrahitur, et cum eâ uterus ipse.* » D. Percy quædam ulcera, tùm fungosa, tùm scrophulosa aut scorbutica, hâc cauterisatione curavit, illiusque in tumoribus indolentibus, glandulosis affectionibus congestionibusque lymphaticis, ut tutior fiat topicorum effectus, usum præcipit.

Hucusquè caloricum vidimus tonicorum et excitantium more agens, structurâ partium organicâ nequaquam immutatâ. Sed cum ex ejus applicatione vesicatio escharificatione oritur,

consectaria complicantur, et distinguenda sunt locale effectum irritatioque comitans ab effectu tonico qui vicinas ad partes propagatur et illarum actiones modificatur.

Si vesicatio instituenda, quod tunc requiritur, cùm citissima excitatio necessaria est, v. g. in febribus gravissimis magnâ virium prostratione stipatis, in syncopis diuturnioribus, metastasibus rheumaticis arthriticisque in cor et cerebrum, veternis, quibusdam repentinis ac vehementissimis hæmorrhagiis, etc., caloricum vulgò adhibetur aquæ bullientis auxilio, quæ primo contactu vesicationem producit, et cujus actioni fines aliquo modo imponendæ sunt.

Si escharificatio tentatur, aut momentaneâ aut lentâ cauterisatione effici potest. Priore in casu, cauterio actuali, in posteriore moxâ utendum est.

Cauterium actuale dicitur instrumentum metallicum, destinatum ad comburendas sive calefaciendas partes quibus immediatè mediatève apponitur. Cæterùm cauterisatio actualis immediata omnibus solidis corporibus ardentibus, si quod opus esset, efficeretur. Nunc metallis solummodò, scilicet ferro, chalybe et satiùs quidem cupro constant cauteria. Species sex à D. Percy (loco citato) describuntur et præcipiuntur, nempe caut. cylindricum, caut. conicum, caut. cultellare, caut. nummularium, caut. octogonum et caut. circulare, quibus caut. olivare peritè addidit prof. Roux, simul atque in locum octogoni nec non nummularii cauterium unicum subdidit. Præterea sunt alia cauteria ad quædam organa aptata, et tandem, ut modò dixi, si necessitas urget, corpus quodcunque metallicum cauterisationis instrumentum fieri queit.

I. Ex modo applicandi cauterii actualis differente, cauterisatio momentanea transcurrentes vel inhærens dicitur.

A. In cauterisatione transcurrente, lineis leviter distinguuntur tegumenta, margine cauterii cultellaris aut acumine truncato

cauterii conici. Cutis non funditùs destruenda est , atque lineæ ita disponuntur ut intervalla inflammatione invadi nequeant. Escharæ subflavæ sunt et angustæ, sed paucis diebus latescunt. Tunc recrudescit dolor , accidit inflammatoria tumefactio , nec non interdùm febris. Escharæ pauxilisper se junguntur , et suppuratio magis minùsve diuturna exoritur.

Hæc cauterisatio , admodùm resolvens , tantummodò in partes integritate pollentes , et nunquàm ad tumores brevi abscessuros efficitur. Celsus et Albucasis illam præcepère ad morbos oris , labiorum, palpebrarum, et generatim omnium partium quarum mollis et tenuis textura est. Cælius Aurelianus, de psoadicis et ischiadicis (lib. v. chronic. 1), idem consilium tradit. Hujusce medicationis ad tumores rheumaticos et scrophulosos articulationum , ad hyarthros synoviales , paralysim localem , nevralgias rheumatismumque chronicum felices exitus observavit D. Percy.

B. Cauterisatio inhærens unicâ applicatione vel quidem iteratis applicationibus constat cauterii actualis candentis ad partem cujus destructio necessaria judicatur. Forma autem cauteriorum pro partium naturâ variatur , cautelæque plurimæ , spectantes ad sensibilitatem ægrotantis , ad modum applicationis , ad organa vicina vitanda seu tuenda, etc. , adhibendæ sunt ; quorum explanationem , cùm sit proposito extranea , et nos longè ab illo deduceret , non aggrediar. Ex hâc cauterisatione dolor acutissimus, sed brevè mitescens, percipitur , et superest eschara cujus crassitudo pro temperie cauterii , vi et iteratione applicationis , partiumque texturâ differt. Organa adusta omninò destruuntur , ac vicinæ partes , vehementer irritatæ, quamdam contractionem patiuntur. Aliquot diebus elapsis , exoritur fluxio deflectens, persæpè febre stipata ; solvuntur escharæ et suppuratio prodit.

Modum hunc cauterisandi multi et cujusque ævi clarissimi practici , nimirum Hyppocrates , Celsus , Aretæus , Galenus ,

Aëtius , Alexander Trallianus , Paulus Ægineta , Albucasis , Fabricius de Hilden , Zacutus Lusitanus , Fabricius ab Aquapendente , Mercatus , M. A. Severinus , Ambrosius Paré , Lancisi , Bianchi , Dekkers , Monro , Haller , Lamsverde , Purmann , Moscati , Pouteau , Dufour , Scarpa , Percy , DD. Larrey , Pelletan , Dupuytren , Roux , etc. , ad morbos varios quàm prosperrimo eventu usurpârunt , v. g. vulnera venenata , affectiones gangrænosas essentielles , gangrænam humidam , cariem , tumores fungosos , canculosos ; polypos , tumores articulationum , fistulas , ozænam , ulcera , quasdam hæmorrhagias , ascitem , anasarcam , affectus catarrhales , phthisim pulmonarem , asthma , nevralgias , rheumatismum , epilepsiam , apoplexiam , etc. , etc.

II. Cauterisatio lenta moxæ appositione constat. Moxa nuncupatur cylindrus materiis combustu facillimis fabricatus , septem octove lineis altus , diametro pro regione corporis ad quam applicandus est , nec non pro irritatione suppurationeque requisitis variante. Gossypium atque tomentum artemisiæ sinensis substantiæ sunt ad illius confectionem frequentius usitatæ ; multa verò alia , si quod opus esset , usurpari possent. Moxa , supernè accensa et inferiore parte ad cutem applicata , variis modis in loco electo stabilitur. Combustio sive agitatione aëris aut folle , sive incurvo calamo , quod satius est , concitatur , donec omninò inustus fuerit cylindrus , et ita ut illius superficies uno eodemque tempore ardeat. Prout combustio ad finem accedit , æger , qui jucundam caloris sensationem primùm perceperat , acutissimis doloribus cruciatur ; tùm cutis crepitat , aduritur exhalatque fumum densum , cornu exustum redolentem. Peractâ operatione , eschara conspicitur sicca , centro nigricans , circumductu subflava : circumjecta cutis rubra est , contracta , persensibilis et interdum phlyctænis notata. Duodecimo vel quindecimo post die , sejunguntur escharæ et suppuratio adest.

Inter therapeuticas rationes , ea est maximè valens cauteri-

sandi methodus , quæ , cùm sua actio , pro spatio , in organa usque profundiora deveniat , ad inflammationes chronicas laryngis , membranarum viscerumque thoracicorum et abdominalium meritissimè adhibetur. Illius utilitas ad morbos organicos spinæ dorsi , ad luxationes spontaneas , tumores articulationum , hyarthros indolentes , rheumatismos chronicos , paralyses rheumaticas arthriticasve , nevralgias inveteratas , quasdam affectiones spasmodicas diaphragmatis , cordis et ventriculi gravissimas , etc. , celeberrimorum medicorum practicâ comprobatur.

Præter varios modos applicandi therapeuticè calorici supradictos , sunt qui sæpenumerò , quin etiam quotidie usurpantur , ut putà balnea tùm tepida aut quidem calida , tùm è vaporibus. Sed omnibus in his casibus , haud simplicia sunt consecutaria , et simul aquâ et calorico pendent. Inter balnea igitur , quæ calida dicuntur , id est $36^{\circ} + 0$, thermom. centigr. superantia , ea duntaxat memorabo. Etenim , quoad actionem , calorici ad superficiem totius corporis applicati haud multum absimilia observantur. Balneum istud generale rarò præcipitur , et tantum ad nonnullas chronicas obstructions , quasdamve cutaneas eruptiones excitandas. Non item de balneo calido locali , pediluvio nuncupato , cujus salutares effectus , singulis diebus , magis ac magis usum confirmant. Pediluvia , aut simplicia , aut sinapi , chlorureto sodii , acidove hydrochlorico additis irritantiora facta , indicantur quotiescumquè ad membra pelvina arthritidis revocanda est ; nec non cùm in quibusdam cephalalgiae , anginæ , amenorrhææ , etc. , speciebus derivatio requiritur.

Hactenus de calorici applicatione locutus , nunc de illius detractone pauca dicam. Caloricum vulgò subducitur aquæ auxilio frigidae (à 0 ad $19^{\circ} + 0$, thermom. centigr.) , variis modis , pro circumstantiis , ad corpus seu illius partes applicatæ , scilicet immersione , affusione , duciis et quidem appositione glaciei

linteris involutæ. Si brevis applicatio refrigerans, primùm sedans ; mox reactione organorum tonica fit ; si diuturnior , magis minusve nervosum systema sedat , circulationemque remittit. Celeberrimi practici , tùm veteriores , cùm recentiores , inter quos Aretæus , Celsus , Marcard , Bordeu , Barthéz , Samoilowitz , DD. Wright , Gregory , Brandreth , Gerard , Currie et præcipuè prof. Recamier , hanc medendi rationem fructuosissimam habuerunt ad effusiones serosas febrem nervosam , cerebralem comitantes , ad typhum , nonnullas pertinaces et absque inflammatione cephalalgias , maniam , hypochondriam , hysteriam , quosdam morbos spasmodicos affectusque exanthematicos , etc.

Quibus nihil ampliùs addam , cùm jam de calorigi usu therapeutico sat latè dixerim , et ad perpensationem luminis confestim pergo.

CAPUT II.

DE LUMINE.

§ I. *De Luminis generatim spectati proprietatibus.*

Lumen fluidum est tenuissimum , lineâ directâ , radiatè et incredibili celeritate se movens , quod alii dicunt è corporibus luminosis , g. v. sole , stellis , etc. , emanans , alii fluidum subtile habent , universè dissitum , his corporibus vibratum. Luminosi radii quædam corpora , *media* nuncupata , permeant , et inter eos ii qui è medio rariore ad medium densius obliquè deveniunt , v. g. ex aëre ad vitrum , extrâ directionem declinant , et , loco immersionis , ad perpendiculum propiùs accedunt ; omnia contrâ si è medio densiore ad medium rarius. Huic luminis deviationi , quæ *Refractio* dicitur , lentium , speculorum urentium , microscopiorum , conspicatorum , telescopiorum , etc. , theoretica insidet.

Corpora , ut et calorico , radiis solaribus dilatantur et calefiunt, undè physici in luce radios calorificos jamdiù suspicati sunt. Hoc tempore , solaris radius trifariis radiis , nimirum luminosis nec non calorificis et chemicis obscuris constans habetur. Isti radii calorifici obscuri , licèt concalefacere et dilatare possint, iisdem proprietatibus, quibus radii calorifici terrestribus corporibus igneis emissi, non gaudent; vitream enim laminam permeant, nec illam admodum excalfaciunt, quod è contrario posterioribus agitur (MARIOTTE, *Traité des couleurs*). Illi insuper prismaticè refringuntur, quod in his nondum observatum est.

Radii verò obscuri chimici, ultrà partem spectri solaris violaceam siti, et prismaticè etiam refracti, calorem non ingenerant.

§ II. *De Luminis therapeuticis proprietatibus.*

Ex variationibus quæ deprehenduntur in coloratione et vigore animantium et vegetantium pro regionibus habitationibusque majorem minoreve lumine gaudentibus, ex influxu lucis in statum ægrotorum atque innervationem, et paroxysmis morborum sub solis occasu redeuntibus, et syncopis aut convulsionibus inter eclipses quandoquè supervenientibus tam sæpè patefacto, facilè judicatur agens istud in therapeuticis rationibus jampridem recensum fuisse. Hùc accedit quòd animalia debilia, apricatione avidè calescentia, occasiones illi usurpando opportunas indicant. Et verò scrophulosis, scorbuticis, rachiticis, necnon morbo chronico languentibus, œdemate, infiltrationè, etc., laborantibus insolatio omni ætate præcepta est; quæ quidem creberrimè iis valdè profuit, præsertim adjunctis cæteris medendi rationibus.

Luminis ea est actio, pro intensitate ac circumstantiis, quæ colorem variet flexibilitatemque aboleat cutis, et illius induratae, densatae corrugataeque functiones modificetur vel quidem pervertat. Atque ideo quædam in insolatione adbibendæ sunt cautelæ;

etenim quæ temperata solis actio utilis est, ea vehementior aut diuturnior obesse potest, et diversitas effectuum à nonnullis practicis observatorum, ex actionis intensitate spatioque variis forsitan manat.

Tandem radii solares, lente vitreâ concentrati, à chirurgis usurpati sunt, ut suprâ, de calorico dicens, adnotavi.

Hos intrâ fines luminis usus therapeutici tenentur, et nunc ad fluidum electricum transeundum est.

CAPUT III.

DE FLUIDO ELECTRICO.

§ I. *De Fluidi Electrici generatim spectati proprietatibus.*

Physici, ad explicanda electrica phænomena, duo agnoscunt fluida, videlicet fl. electricum vitreum et fl. electricum resinosum. Hæc duo fluida in cunctis naturæ corporibus simul existunt, sed ita conjuncta et neutralisata, ut, primo aspectu, illorum existentia nullo modo deprehendatur. Diversis modis sejungi possunt, et tunc sensilia evadunt. Illis inest proprietas attrahendi deinceps repellendi corpora leviora; insuper mutuò sese attrahunt, et, è contrario, fluida ejusdem naturæ sese repellunt, idest fl. vitreum à fl. vitreo repellitur; item de fl. resinoso.

Electricitas manifestari queit: 1°. *affricu* quarumdam substantiarum, v. g. resinæ, vitri, etc.; quod machinâ electricâ usitatâ factitatur; 2°. *excalfactione*, ut observatur in zeolithe; 3°. *contactu corporum naturâ diversâ*, ex. causâ, zinci et cupri, quorum aliud vitream, aliud resinosam electricitatem nanciscitur. Hujusce ultimi modi pila voltaïca exemplum præbet.

Electricitatem transmittunt quædam corpora, *conductores* nuncupata, v. g. metalla, animantia, etc.; quædam alia contrariò,

idioelectrica dicta, isto fluido non permeantur, putà resinæ, olea, vitrum, etc.

Fluidum electricum, id est, resinosum aut vitreum, corpora plurima ad fusionem et ignitionem usque cāfacere potest. Præpollens ad solvenda composita, illius usus recentioribus chimie progressibus insigniter profuit.

§ II. *De Fluidi Electrici therapeuticis proprietatibus.*

Vix innotuit hujusce fluidi in cuncta naturæ entia valentissimus influxus, cū illius applicatio therapeutica tentata fuit. Reverà agens, ex quo effectus tam insoliti scatebant, naturâ in spem felicissimi exitûs inducebat. Electricitas ergò, veluti pharmaca quævis primū usitata, panacea facta est, atque mox obsolevit. Attamen clarissimi viri, Jallabert, Sauvages, Lindhult, Dehaen, Cavallo, Mauduit, Wilkinson, etc., illam variâ fortunâ ad morbos humani corporis adhibuerunt. Actio enim quā in œconomiam exercet perspicua est; systemata nervosum et musculare præsertim stimulat; arteriarum contractilitatem adauget circulationemque properat; temperiem animantium amplificat; quasdam secretiones, v. g. salivæ, transpirationis, lotii, etc., motumque ductûs intestinalis peristalticum celerat; utero ipso energiam amenorrhæâ plus minùs diurnâ amissam sæpissimè restituit.

Imprimis notandi sunt effectus electricitatis dictæ galvanicæ. Ex illius applicatione ad corpora animalium recens necatorum contractiones oriuntur vitam quodam modo simulantes. Academiæ scientiarum relatores, de canibus, quorum caput fluido è pila voltaicâ ingentissimâ profluente trajicitur, narrantes, hæc phænomena talibus verbis exarârunt: « La gueule s'ouvre, » les dents s'entrechoquent, les yeux roulent dans leur orbite; » et si la raison n'arrêtait l'imagination frappée, l'on croirait » presque que l'animal est rendu aux souffrances et à la vie. » In cadaveribus ipsis hominum naturâ obitorum succussus contractiles

eodem modo producti fuerunt. Quid de istius materiei actione in liquida quibus entium viventium solidâ imbuuntur? Nonne fluidum, corpora quàm maximè refractaria facillimè aggrediens, humores nostros pariter dissolvere potest? D. de Humboldt, ejus influxui submissâ à vesicantibus plagâ, defluvium observavit seri acris corrosivique, cutem subsitam rubefacientis.

Rationale igitur est putare agens tantâ vi pollens et stimulationis tam vehementis capax, ad morbos plurimos feliciter adhiberi posse. Et verò, ut jamjamque indicabo, usurpatum est. Sed priusquàm casus enumerem in quibus congruit illius usus, haud abs re fuerit modos communicationis varios disquirere.

Communicari potest electricitas tribus præcipuis instrumentis, nempe machinâ electricâ dictâ, lagenâ leydense et pilâ voltaicâ.

I. *Electrisatio machinæ electricæ ope.* In hoc electrificationis modo, fluidum *balneo, scintillis, acuminibus aut frictionibus* applicatur.

A. *Balneo.*—Balneum electricum dicitur communicatio simplex inter ægrotantem, à terrâ idioelectricis substantiis sejunctum necne, et conductorem machinæ electricæ actæ constituta.

B. *Scintillis.*—Æger, idioelectricis materiis à terrâ semotus, machinæ electricæ conductorem tenet; fluidum ergò in illius organis congeritur et ad corpora vicina tendit. Tunc, si cuicumque illius parti admovetur excitator, extremitate sphæricâ, solo tenus catenâ metallicâ productus, fluidum scintillans prodit.

C. *Acuminibus.*—Hic electrificandi modus à præcedente excitatorum formâ unicè discrepat. Enim verò excitator in apicem desinit, et fluidum absque scintillis detrahatur.

D. *Frictionibus.*—Pars corporis electrificanda panno laneo tenui obducitur, sphæraque excitatoris ad pannum proximè admoveatur, sive detrahatur, sive immittatur fluidum.

II. *Electrisatio lagenæ leydensis ope.* Ægrotans tangit simul, immediatè vel conductore quodam, et globulum qui ad arma-

turam instrumenti interiorum producitur, et armaturam exteriorum; inde commotio pro fluidi electrici majore minoreve accumulatione varia percipitur.

III. *Electrisatio pilæ voltaicæ ope.* Conductores è polis pilæ proficiscentes ad corpus apponuntur ægrotantis qui successivas commotiones, nullo ferè intervallo distinctas, experitur. Hæc commotionum continuitate inter se differunt electrificationis modi duo ultimi.

Electricitatis voltaicæ communicandæ duæ sunt diversæ rationes, quoad conductorum applicationem; priore, conductores, in laminam desinentes, ad cutem admoventur; posteriore verò, ad acus organis infixas, quod est *Electropunctura*. (Machinâ electricâ, ut et voltaicâ pilâ, *Electropunctura* efficitur.)

Ni frequentius successerit electricitas olim usurpata, medicationi nihil noxæ sæpissimè, et fatendum est inceptas curationes, aut perpaucò judicio aut minore perseverantiâ, in plerisque occasionibus frustratas fuisse. Easdem enim causas non semper agnoscunt omnes morbi similes, atque pervariis læsionibus pendere possunt. Indagatis igitur his causis, illarum naturâ medicus ducendus est; quod si semper fieret, inutiles rariùs evaderent therapeuticæ rationes.

Fluidum electricum, vicissim laudatum et neglectum, tandem hoc tempore à multis practicis adhibitum fuit, inter quos præsertim DD. Grapengiesser, Westring, Aldini, Bally, Andrieux, Pascalis, Mojon, Rossi, etc.; et jam, ex illius opportunâ applicatione, in plurimis casibus commoda magna collegerunt, scilicet ad quasdam paralyses et surditates, ad rheumatismum sive simplicem sive arthriticum, ad nevralgias, amaurosim, amenorrhæam, asthma, scrophulos, etc. Asphyxia, specialiter à fulmine, morbus est ad quem electricitas, rarò quidem, fructuosè usitata fuit; non verò mirandum, cum enim motus respiratorii in cadaveribus pilâ voltaicâ suscitati sint, nequa-

quàm desperandum illos pariter in iis qui asphyxiâ tentantur revocandos iri. D. Leroy electropuncturam in hujus modi occasione potissimùm laudat: acus infigit ultimo spatio intercostali thoracico, ità ut diaphragmatis fibræ, loco insertionum; attingantur; tùm, simul atque insufflationem cautissimè exsequitur, conductores pilæ ad acus applicat; indè contrahitur diaphragma, pectus dilatatur et aër nullo labore introducitur. Quo peracto, insufflationem electricumque fluidum influens cessat, expirationem pressione abdominis efficit, et posthinc inspirationes expirationesque eâdem arte iterat.

§ III. *De Acupuncturâ.*

Nunc de operatione quâdam, Sinis et Japonibus omni ætate exsecutâ, id est acupuncturâ, dicendum superest; illius enim effectus, opinione multorum, proficiscuntur è detractatione fluidi electrici in organis dolentibus accumulati. Ista operatio introductione tenuissimarum, levissimarum, acutissimarumque acum in corpora viventia continetur. Consectaria ejus et efficientiam therapeuticam DD. Berlioz, Beclard, Bretonneau, Haime, Demours, Sarlandière, Scott, Churchill, etc., præsertimque J. Cloquet studiosè perpensaverunt. Acus, longitudine variâ, chalybe recocto, argento vel auro, in globulum, quantum fieri potest, extremo retuso desinens, perpendiculariter in cutem, sive rotatione, sive pressione lentâ infigitur; et demùm, transfossâ cute, pro partium mollium altitudine et doloris sede, obliquè vel directè adigitur.

Aliquot momentis post introductionem in organa, oxydatur, ampliùs plerumquè ab apice; pars infixæ oxydo modò penitùs obducitur, modò sparsim maculatur. Huic verò oxydationi, quæ in hominibus valentibus ægrotantibusve, in animantibus, in cadaveribus aquâ calidissimâ mersis æquè prospicitur, curationis phænomena nullo modo cognata videntur. Si acus, metallo oxydabili,

in quodcumque animal infixâ, ad solum usque producatûr, fluidum electricum effluit, multiplicatore Schweigeri indicandum. Hoc phænomenon oxidationis consecrarium prof. Pelletan et Pouillet demonstrârunt. Et enim, si metallo non oxydabili acus, quod therapeuticos effectus minimè variat, nulla electricitas deprehenditur.

Ex his, duæ præcipuæ hypotheses ad actionem acupuncturæ enucleandam. Sic, D. J. Cloquet accumulationem fluidi electrici dolentibus in organis existimans causam doloris et etiam inflammationis, detractiône hujusce fluidi accumulati curationes explicat.

Prof. Pelletan contrâ, anatomicis necnon physiologicis disquisitionibus recentioribus nixus, contendit, 1°. nervos specie differentes, in cunctis organisationis partibus conjunctè detectos, profluentibus contrariis cujusdam fluidi, electricitatis more agentis, permeari; 2°. cerebro ejusque appendicibus istos profluentes foveri; 3°. innervationem ex concursu horum contrariorum profluentium in intimis organis oriri. Quæ cùm ita sint, metallica acus, in partes molliores infixâ, plurima inter hæc filamenta nervosa necessariò attingit, atque, cùm sit conductor brevior simul et aptior, illorum contrarios immediatè conjungit profluentes qui jam tùm trajicere organa, ad quæ deferuntur nervosa hæc filamenta, desinunt. His positis, omnia acupuncturæ phænomena apprimè explicantur; dolor enim imminutione innervationis minuitur vel curatur; acûs oxydatio pro sede et naturâ profluentium varia evadit; consecraria operationis perdiversa contactu nervosorum filamentorum multiplice continentur. Hâc hypothesi etiam torpor, quin imò et sedatio generalis intelligi possunt.

Cæterùm, ut hæc sunt, prosperi acupuncturæ eventus in innumeris casibus perspicui sunt, et acuum, quæ in cunctis organis absque periculo infigi queunt, ut DD. Beclard, Orfila, Bretonneau, J. Cloquet, Velpeau, Segalas, Dantu, etc., experimentis cons-

tat, acuum, inquam, ad curationem nevralgiarum, rheumatismorum seu acutorum seu chronicorum, dolorum articularium à ligamentis tractis, contracturarum muscularium, gastrodyniæ, pleurodyniæ, arthritidis, asthmatis, ophthalmiæ, pleuresiæ, inflammationis intestinorum, etc., introductio persæpè efficaciter usurpata est.

Jam autem suprà dictis, tùm de calorico et lumine, tùm de electricitate, quænam auxilia therapeutica è fluidis imponderabilibus indicavi, et ad argumentationem cætera explanatoria reservans, de his, etsi breviter, tamen sat fusè latèque disserui.